



Bilten

mjesečni



maj
svibanj
2025.

omladinska mreža bosne i hercegovine
ISSN 2831 - 0845

312

Dragi prijatelji/ce,

Predstavljamo vam **majsko** izdanje (broj **312**) mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine.

Bilten izlazi na bosanskom-crnogorsko-hrvatsko-srpskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.orctuzla.ba



SADRŽAJ

Aktivnosti u maju.....	2
Planovi za juni	7
Aktivnosti članova mreže.....	8
Saopštenja/informacije/donatori/pozivi.....	18

Uživajte u čitanju!

AKTIVNOSTI ORC/HCA U MAJU



12 GODINA SNAGE, ZAJEDNIŠTVA I MLADOSTI – ORC OMLADINSKA GRUPA SLAVI ROĐENDAN!

Već 12 godina Omladinska grupa Omladinskog resursnog centra Tuzla predstavlja sigurno mjesto za hrabre ideje, snažne glasove i mladalački bunt koji mijenja stvarnost. Od skromne inicijative do pokreta koji okuplja i inspiriše – bili smo podrška kada je trebalo stati uz druge, pokretači kad su promjene bile neizbježne, i porodica kada je zajedništvo bilo najpotrebnije. Dvanaest godina zajedničkih koraka – akcija, osmijeha, borbi i pobjeda. I što je najbolje? Tek smo počeli.

Zahvaljujemo svakome ko je bio dio ovog putovanja. Ovo slavimo zbog vas – zbog vaše vjere, vaše energije i vaše spremnosti da zajedno gradimo budućnost u kojoj glas mladih odzvanja snažno i jasno.

S ljubavlju i snagom koja ne posustaje – za još mnogo godina, još više bunta i još jače zajedništvo.



Uspješno završena akcija prikupljanja knjiga

Sa radošću obavještavamo da je 8. maja 2025. godine uspješno okončana akcija prikupljanja knjiga za djecu bez roditeljskog staranja. Ova plemenita inicijativa trajala je od 1. februara, a zahvaljujući velikodušnosti naših sugrađana, prikupljen je značajan broj knjiga koje su donirane Domu za djecu bez roditeljskog staranja u Tuzli.

Rezultat? Osmijesi koji govore više od riječi i neprocjenjivi trenuci radosti u dječijim očima.

Zahvaljujemo svima koji su učestvovali – onima koji su donirali knjige, širili vijest i pružili podršku. Posebnu zahvalnost upućujemo upravi Doma koja nas je dočekala s toplinom i otvorenim srcem.

Zajedno pokazujemo da čarolija pisane riječi može stići tamo gdje je najpotrebnija. Hvala vam što ste bili dio ove priče i dali doprinos svijetu u kojem svako dijete ima priliku da zakorači u svijet mašte





PJESNIK U STARKAMA - Promocija knjige “Pjesme i priče sa dna kace” Maria Vranješa

U srijedu, 14.05., u domu mladih u Banja Luci, sa početkom u 19 časova održana je promocija knjige “Pjesme i priče sa dna kace” Maria Vranješa.

Mario Vranješ – pjesnik u starkama i nekadašnji radijski glas Tuzle, čovjek koji piše iz želuca, iz srca i sa dna – gdje ono najdublje i najskrenije dozrijeva – na promociji je govorio o svom stvaralačkom putu, inspiraciji i svijetu u kojem nastaju njegove pjesme. Bio je to susret sa stihovima koji ne mole za pažnju – oni je osvajaju.

Događaj je organizovan u okviru Dana ALF u BiH, a uz podršku ALF fondacije.



Rastemo zajedno: održan “Leadership Bootcamp” u okviru projekta “Rise and lead”



U okviru projekta *Rise and Lead*, 16. i 17. maja 2025. godine održan je dvodnevni **Leadership Bootcamp** u jedinstvenom ambijentu Doma književnosti Tuzla. U atmosferi koja je spojila znanje, smijeh i povezivanje, učesnici su zakoračili u svijet liderstva kroz niz interaktivnih aktivnosti, timskog rada i iskrenih razgovora.

Tokom radionice, učili smo šta čini pravog lidera – od liderskih osobina i stilova vođenja, do konkretnih alata poput SWOT analize i SMART ciljeva. Nije nedostajalo ni zabave, novih

prijateljstava i onih iskri koje se pojave kad se mladi okupe sa svrhom.

Jer lideri se ne rađaju – oni se grade. I upravo smo to i radili.

Aktivnost je realizovana uz podršku **@fondacija_tuzlanske_zajednice**, u okviru projekta „Jačanje civilnog društva i demokratske kulture u TK“, koji finansijski podržavaju **Savezno ministarstvo za vanjski razvoj Njemačke (BMZ)** i **Freudenberg fondacija**.

Rise and Lead nije samo naziv projekta – to je poziv na djelovanje.



Održan sastanak omladinske grupe

Dana 23. maja, u prijatnoj i opuštenoj atmosferi kafe bara *Sloboda*, održan je sastanak Omladinske grupe Omladinskog resursnog centra Tuzla. Događaju je prisustvovalo 11 mladih članova koji su kroz razgovor, smijeh i razmjenu ideja pokazali snagu zajedništva i kolektivne kreativnosti.

Ovaj susret bio je prilika za otvoreni dijalog o budućim aktivnostima, podjelu prijedloga i međusobnu inspiraciju. Takvi neformalni, ali sadržajni susreti igraju ključnu ulogu u jačanju timske kohezije, izgradnji povjerenja i kontinuiranoj motivaciji za zajednički rad.

Zahvaljujemo se svima koji su učestvovali, a nove ideje i inicijative koje su se rodile tokom sastanka tek dolaze – spremni smo za nove korake, zajedno.





Omladinska grupa ORC Tuzla odala počast ubijenoj mladosti na “Kapiji”

Povodom obilježavanja godišnjice masakra na tuzlanskoj Kapiji, članovi Omladinske grupe Omladinskog resursnog centra Tuzla položili su cvijeće na spomen-obilježje u znak sjećanja na 71 mladu osobu koja je tragično izgubila život 25. maja 1995. godine.

Okupljanje ispred Kapije proteklo je dostojanstveno i emotivno, ispunjeno šutnjom, poštovanjem i dubokom refleksijom. Mladi članovi grupe time su još jednom potvrdili svoju posvećenost njegovanju kulture sjećanja, promicanju mira i odgovornosti prema prošlosti.

"Važno je da se prisjećamo i da učimo nove generacije o značaju mira, tolerancije i ljudskih prava," poručili su iz grupe.

Omladinska grupa ORC Tuzla nastavlja s aktivnostima koje mladima širom Tuzle i regije pružaju prostor za izražavanje, učenje i doprinos zajednici – podsjećajući svakim korakom da mladost ima i snagu i odgovornost da gradi drugačiju budućnost.



Furajmo zajedno: u Sarajevu održan trening „Produkcije izložbe“

Od 28. do 30. maja 2025. godine, Hotel Hills u Sarajevu bio je epicentar kreativnosti, timskog rada i vizije budućih izložbi. U okviru trodnevnog treninga “Produkcija izložbe” Učesnici iz cijele Bosne i Hercegovine imali su priliku da istraže svaki segment izložbenog procesa – od ideje do realizacije. Uvodne radionice “Uspješna izložba počinje dobrim timom” i “Tim na zadatku” odmah su probudile timski duh, dok je večernja sesija “#hashtag: Kreiraj, podijeli, inspiriši” otvorila prostor za digitalnu kreativnost i razmjenu. Posvećen razumijevanju izložbe kao moćnog društvenog alata. Kroz sesije “Snaga izložbi”, dvije runde dizajniranja izložbi i radionicu “Od ideje do računa”, učesnici su ušli u srž produkcije – balansirajući umjetničku i organizacijsku stranu posla.

Ispred ORC Tuzla na treningu su učestvovali: **Naida Kuljanin, Nadia Fejzić, Alena Arapović, Marina Tasovac i Nadina Mehić.**

Ovaj trening realizovan je kroz projekat **FURAJ MIR**, s misijom osnaživanja mladih da koriste izložbe kao alat za izražavanje, angažman i promjenu.





Dijalog mladih i vlasti Grada Tuzla: „Mobilnost sada! – Više prilika, više znanja“

Grad Tuzla i Institut za razvoj mladih KULT 29. aprila u Domu mladih Tuzla organizovali su Dijalog mladih i vlasti.

Dijalog mladih i vlasti je aktivnost usmjerena na jačanje participacije mladih u procesu donošenja odluka koje direktno utiču na njihov svakodnevni život. Tokom sastanka razgovaralo se o podršci mladima kroz poboljšavanje mobilnosti, a kako bi imali više prilika za sticanje novih iskustava, znanja i vještina. Kroz dvosatni razgovor definisani su neki od ključnih zaključaka i preporuka za funkcionisanje transfera za mobilnost.



Aktivnost je realizovana u sklopu projekta “Smislino, kreirajmo i usvojimo politike prema mladima” koji finansira Evropska unija, a provodi Institut za razvoj mladih KULT partnerstvu sa Regionalnom kancelarijom za saradnju mladih (RYCO), Vijećem mladih Federacije BiH, Mrežom omladinskih centara za animiranje, razvoj i trening Republike Srpske (M.O.C.A.R.T.) i Asocijacionom srednjoškolaca u BiH.

Omladinski resursni centar Tuzla predstavljao je Miralem Tursinović.

REDOVNE AKTIVNOSTI ORC I HCA TUZLA

Tokom maja smo radili na održavanju i razvoju komunikacija i koordinacije unutar Omladinske mreže Bosne i Hercegovine (www.orctuzla.ba). U okviru toga smo svakodnevno na mejling listu mreže (omladina@orctuzla.ba), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Isto tako, radili smo i na održavanju komunikacija i koordinacije unutar Bosanskohercegovačke Anna Lindh mreže (<https://orctuzla.ba/alfbih/>, <https://www.facebook.com/groups/httpswww.alfbih>) Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA JUNI 2025.

- ❖ Nastavak implementacije projekta: „**Rise and lead**“ podržan od strane **Fondacije Tuzlanske zajednice**. U okviru ovog projekta, od 12. do 14. juna u Tuzli održavamo trening „**Plan it. Pitch it. Lead it.**“ Trening je namijenjen mladima koji imaju ideje, ali im je potrebna podrška i znanje kako bi ih pretvorili u konkretne projekte koji mijenjaju zajednicu. Tokom tri dana intenzivnog rada, učesnici će naučiti: kako osmisliti i strukturirati projekt, kako napisati projektni prijedlog koji prođe evaluaciju, kako voditi projekat od ideje do realizacije, te će razvijati vještine timskog rada i prezentacije.

Prijaviti se možete do 9. Juna: <https://forms.gle/4tgkWDQWWFAiJ67v9>

- ❖ U Tuzli ćemo 6. Juna održati sastanak UO ALF BiH Mreže, godišnji sastanak članica mreže i Skupštinu, na kojoj ćemo birati članove Upravnog Odbora.
- ❖ Pripreme za održavanje ALF Foruma u Tirani, Albanija;
- ❖ Nastavak rada na projektima, fundraisingu;
- ❖ Priprema projektnih prijedloga za pozive koji su u toku;
- ❖ Razvoj strategije aktivnosti ORC i Omladinske grupe za 2025. godinu.

A do narednog biltena puno pozdrava!



AKTIVNOSTI ČLANICA OMLADINSKE MREŽE BiH



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac



Dnevne radionice

Omladinska organizacija Svitac je nastavila sa svakodnevnim interaktivnim i online aktivnostima. Mlađi učesnici su radili kreativne i edukativne stvari prilagođene uzrastu, uz pomoć lokalnih i međunarodnih volontera. Ovaj mjesec su razgovarali o proljetnim promjenama u prirodi, šta se dešava sa biljkama i drvećem, ali i kako proljeće utiče na ljude i njihovo raspoloženje. Najmlađi učesnici su uživali u kreativnom dijelu i modeliranju zabavnih predmeta (npr. rakete, gljive, krokodili, narukvice, razno cvijeće u vazama ili sa stabljikama, zečevi i crteži u Picassovom stilu). Grupa je nastavila sa muzičkim radionicama, uvježbavanjem ritmova i pjesama. Učesnici su nastavili da uče ćirilčno pismo vežbajući pisanje slova Ы, Ю, Ж и И (Dž, Đ, Ž, I). Radili su vježbe zagrijavanja i jogu za djecu, a svakog su četvrtka plesali, bavili se sportom i vježbali pažnju i koncentraciju čitajući i slušajući priče. Na radionicama engleskog, njemačkog i turskog jezika učili su riječi koje se odnose na proljeće, domaće životinje, 4 prirodna elementa, knjige i sladoled. Cilj ovih edukativnih aktivnosti je da djeca razviju maštu i da koristeći razne materijale izraze svoju kreativnost, te da razviju motoriku, pamćenje, osjećaj tolerancije i poštovanje prema drugima i usvoje lijepo ponašanje. Sve radionice su implementirane uz edukativnu vizuelnu metodu sa slikama i videom.



Uzrast 13+ je učestvovao u diskusijama/radionicama na teme: kulturna raznolikost, izgradnja mira, kako podržati ljude koji su diskriminirani, umjetnost, muzika, film i uloga žena u Hollywoodu. Na ovaj način želimo mladima pružiti siguran i neutralan prostor, u kojem mogu reći svoje mišljenje.

Na engleskim i njemačkim radionicama su radili na uvježbavanju gramatike i svakodnevne komunikacije, čitanju i prevođenju kratkih tekstova i fraza, školskim domaćim zadacima i zanimljivim projektima.



Radionice gitare

Učesnici su radili na dječijim pjesmama, klasičnim kompozicijama i popularnim melodijama, s fokusom na tehniku, čitanje nota i nove kompozicije.



Radionice sambe

Grupa je nastavila s vježbanjem kompozicije "Achilles Feel" i započela rad na novoj ritmičkoj ideji koristeći kante i samba instrumente.



Muzičke radionice (mlađa grupa)

Kroz zajedničke vježbe i istraživanje ritmova, učesnici su započeli rad na potpuno novoj muzičkoj ideji, u opuštenoj i kreativnoj atmosferi.



Međunarodni dan porodice

Na Međunarodni dan porodice, održali smo radionicu i na taj način naglasili povezanost i podršku koju porodica pruža. Ovo je bila savršena prilika da se djeca uključe u značajnu i zabavnu aktivnost koja im pomaže da prepoznaju važnost porodice u njihovom životu. Tokom ove radionice, učesnici su izrađivali šarene otiske svojih dlanova. Na svaki prst su nacrtali nasmijano lice koje je predstavljalo jednog člana porodice — roditelje, braću i sestre, bake, nene i djedove. Ovi otisci su potom izrezani i zalijepljeni na veliki plakat u obliku kuće, koja simbolizira toplinu i zajedništvo porodičnog doma. Cijela aktivnost je bila ispunjena malim ručicama i sretnim licima — savršen poklon porodicama koje djeci pomažu da rastu, uče i napreduju.



Međunarodni dan zajedničkog života u miru

Međunarodni dan zajedničkog života u miru simbolizira jedinstvo, toleranciju i harmoniju među kulturama. Ovaj poseban dan podsjeća nas da mir počinje razumijevanjem, posebno među najmlađim članovima naše globalne zajednice. Omladinska organizacija Svitac je organizovala interaktivnu radionicu s tinejdžerima i mlađom djecom. Učesnici su izrađivali šarene postere sa golubicama – univerzalnim simbolom mira – i ispisivali riječ "mir" na različitim jezicima. Aktivnost je pokrenula pitanja i odgovore o tome šta mir znači u njihovim životima i kako mogu doprinijeti ljepšem i inkluzivnijem svijetu. Kroz kreativnost i zajednički dijalog, radionica je osnažila mlade da postanu ambasadori mira u svojim zajednicama.





Svjetski dan pčela

Povodom Svjetskog dana pčela, obilježili smo važnu ulogu koju pčele imaju u našem okruženju kroz zabavnu i edukativnu radionicu za djecu. Aktivnost je spojila kreativnost i učenje, dok su mališani izrađivali simpatične pčelice koristeći oblike svojih dlanova na papiru – pretvarajući male ruke u zujave umjetničke radove! Uz kreativnu radionicu, djeca su slušala zanimljivu prezentaciju o pčelama, njihovoj ulozi u oprašivanju i načinima na koje svi možemo pomoći u njihovoj zaštiti. Bila je to radosna aktivnost ispunjena smijehom, znanjem i dubljim razumijevanjem značaja ovih malih, ali moćnih oprašivača.



Svjetski dan kulturne raznolikosti za dijalog i razvoj

Svake godine 21. maja obilježava se Svjetski dan kulturne raznolikosti za dijalog i razvoj, koji nas podsjeća na važnost poštovanja i slavljenja mnogobrojnih kultura koje čine naš svijet. Ovaj dan podstiče razumijevanje, inkluziju i miran dijalog među ljudima različitih porijekla. Održali smo zanimljivu aktivnost s djecom i mladima, gdje su crtali i dijelili priče o različitim kulturama i običajima. Ada i Paula, međunarodne volonterke iz Njemačke, govore su o svojoj zemlji i pokazale slike tipičnog doručka, odjeće i isječke videa iz dječije obrazovne emisije. Takođe su igrali igre sa edukativnim karticama o poznatim kulturnim mjestima i zastavama iz cijelog svijeta. Naši volonteri su izradili poster koji simbolično predstavlja kulturnu raznolikost. Cilj ove aktivnosti je da pomogne mladima istražiti ljepotu različitosti i naučiti kako nas razumijevanje drugih zbližava.



Za juni se planira nastavak svih aktivnosti Omladinske organizacije Svitac.

Institut za razvoj mladih KULT



4th Viteške brigade

34 – 36 BA, 71210 Ilidža, Sarajevo

Tel: +387 33 778 778.

Fax: +387 33 778 79

E-mail: kult@mladi.org,

web: www.mladi.org



#JOSUVIJEKSAMTU – Mladi u BiH ulažu u svoje snove i budućnost!

Institut za razvoj mladih KULT u saradnji sa Ekonomskim fakultetom Univerziteta u Sarajevu organizirao je panel “Ne pakujemo kofere već ideje: Obrazovanjem i biznisom ka budućnosti koju biramo”, u okviru kampanje #JOSUVIJEKSAMTU. Panel je bio sjajan povod za okupljanje studenata i mladih ljude iz različitih sfera, kako bi zajedno otvorili iskren dijalog o izazovima ali i prilikama i budućnosti mladih u Bosni i Hercegovini.

Osim prilike za razgovor, panel je bio platforma za razmjenu ideja, inspiraciju i konkretne primjere kako se mladi mogu osnažiti i aktivno kreirati svoju budućnost, u svojoj zemlji.

Kroz iskrene i iskustvom praćene priče panelista – dr. Anesa Hrnjića sa Ekonomskog fakulteta UNSA, Amile Nuhić, vlasnice veterinarske apoteke „Linea Alba“, Adne Salman – Perva, vlasnice salona vjenčanica „Tiara“ i učesnice kampanje #JOSUVIJEKSAMTU te Isidore Mandić, studentice i aktivistkinje, mladi su mogli čuti koliko je važno obrazovanje za karijeru i budućnost, kako izgleda put pokretanja vlastitog biznisa ali i borba za ostanak i uspjeh u BiH.

U toku interaktivne diskusije, studenti su podijelili svoje dileme, mišljenja i planove za budućnost. Panel je otvorio prostor za ohrabrujuće poruke – da promjena počinje od pojedinca, da snovi ne poznaju granice i da BiH može biti mjesto gdje je uspjeh moguć, ukoliko mladi odluče da budu dio te priče.

Ovaj panel još jednom je pokazao koliko je važno čuti glas mladih i pružiti im podršku da stvaraju i vjeruju. Serijal videa u sklopu kampanje #JOSUVIJEKSAMTU moguće je pogledati [OVDJE](#).





Indeks učešća mladih – Znamo li stvarno kako životi mladih izgledaju?

Institut za razvoj mladih KULT održao je prvu prezentaciju regionalnog Indeksa participacije mladih za 2023. godinu. Indeks učešća mladih daje uvid u mogućnosti mladih da se uključe u različite aspekte društva, te obuhvaća njihovu uključenost u procese donošenja odluka, njihov pristup tržištu rada i njihovo sudjelovanje u društvenom životu. Podaci su prikupljeni za Bosnu i Hercegovinu, Srbiju, Albaniju, Crnu Goru, Sjevernu Makedoniju, Kosovo i Tursku.

Indeks učešća mladih razvila je Mreža omladinskih organizacija regiona Zapadnog Balkana i Turske 2016. godine te se od tada Indeks izdaje svake godine. Indeks učešća mladih predstavlja novitet za BiH s obzirom na to da je ovo prva godina u kojoj se radi prikupljanje i predstavljanje službenih podataka za 25 indikatora koji su obuhvaćeni Indeksom, a koji se fokusiraju na mlade i čiji je cilj usmjeravanje i prilagođavanje politika prema mladima u BiH.

Nakon prezentacije organizirana je i panel diskusija o temi „Dostupnost statističkih podataka o mladima u Bosni i Hercegovini – izazovi i prilike“.

Institut je od kraja 2024. godine uključen u projekt “Stronger Voices for Better Choices – Youth Hub for WB&T” finansiran od strane Evropske komisije u okviru Instrumenta pretpristupne pomoći Evropske unije zemljama Zapadnog Balkana i Turskoj (IPA III) kroz program Multi-country annual action plan in favour of the Western Balkans and Türkiye for 2024 (IPA III). Mrežu omladinskih organizacija, u okviru projekta koji podržava Evropska unija, koordinira Fondacija Ana i Vlade Divac iz Srbije u partnerstvu sa Beyond Barriers iz Albanije, Youth Alliance – Kruševo iz Sjeverne Makedonije, NGO Prima iz Crne Gore, Community Volunteers Foundation (TOG) iz Turske, Democracy for Development s Kosova te Institut za razvoj mladih KULT iz BiH.





Uspješno je završena Druga konvencija o radu s mladima u BiH!

Kako bi svi oni koji se bave pitanjima mladih i ulažu u mlade dobili priliku za razmjenu iskustava i za proslavu svih dosadašnjih uspjeha, Institut za razvoj mladih KULT organizirao je Drugu konvenciju o radu s mladima u Bosni i Hercegovini.

Događaju je prisustvovao veliki broj učesnika koji teže da se njihov glas čuje, a koji se fokusiraju na važna pitanja vezana za omladinski sektor i prilike za nova partnerstva, poznanstva i zajedničke inicijative. Učesnici događaja imali su priliku prisustvovati panelu *“Omladinski rad kao alat za osnaživanje mladih”*, a kroz paralelne sesije, nastavljen je razgovor o poticanju inkluzije kroz omladinski rad, o budućnosti omladinskog rada, njegovoj vidljivosti u medijima, o životnom pozivu i/ili poslu, ali i o prevenciji koja je jako važna kada je riječ o radu s mladima.

Sjajni učesnici i panelisti doprinijeli su svojim idejama i pitanjima, kreirajući atmosferu za kreativnu razmjenu mišljenja. Zahvaljujući korisnim i zanimljivim diskusijama, te iznošenju različitih perspektiva, svaka sesija bila je prilika za učenje i međusobnu inspiraciju. Tokom drugog dana konvencije fokus je stavljen na održivost omladinskog rada, važnost saradnje sa drugim akterima, ali i pitanje kako nastaviti ulagati u omladinski rad i kreirati njegovu budućnost.

Zaključci konvencije će bilježiti stavove svih učesnika kako bi se svim akterima, posebno donosiocima odluka i javnosti poslala poruka o važnosti rada s mladima, prepoznavanja svih aktera, te uključivanja BiH i aktuelne programe u regiji i Evropi.

Drugu konvenciju o mladima u BiH organizirao je Institut za razvoj mladih KULT u partnerstvu sa Ministarstvom civilnih poslova u BiH a uz podršku Ambasade Švedske u BiH. Medijski partner događaja bila je Antena Sarajevo.





Udruženje za društvena istraživanja i komunikacije - UDIK
Ul. Grbavička 51, 71000 Sarajevo
Tel./fax: +387 33 978 600; +387 33 978 605
E-mail: official.udik@outlook.com
official.udik.brcko@outlook.com
Web: www.udik.org; www.udik-brcko.org



Pamtimo zločine u brčanskom Zanatskom centru

U okviru Inicijative za komemorisanje civilnih žrtava rata u Brčkom, UDIK je u srijedu 7. maja 2025. u povodu godišnjice ratnih zločina u Brčkom organizovao komemoraciju na mjestu ubistva Hajrudina Muzurovića i Huseina Krše. Tim povodom, u Oslobođenju je izašla osmrtnica u znak sjećanja na ova dva i ostale civile ubijene na ovom mjestu od strane Gorana Jelisića i pripadnika VRS. Tokom komemoracije ponovo je upućen apel lokalnim vlastima da se ovo mjesto obilježi spomen-pločom. Nakon komemoracije održan je



sastanak sa lokalnim političarima i porodicama ubijenih civila. U dnevnom listu Oslobođenje objavljena je priča koordinatora UDIK-a Edvina Kanke Ćudića pod nazivom „Ubistva u Zanatskom centru“ koja donosi ispovijest Šuhre Ahmetović, sestre ubijenog Brčaka Hajrudina Muzurovića.



Građanska inicijativa za sjećanje i komemoracije

Kako bi nastavio promovisati aktivnu ulogu mladih u društvu, kao i važnost saradnje vladinog i nevladinog sektora, UDIK je pokrenuo mrežu pod nazivom Građanska inicijativa za sjećanje i komemoracije (GISK). Cilj ove inicijative jeste zajednički građanski i politički angažman u kulturi sjećanja, povećanje društvene kohezije i raznolikosti u Bosni i Hercegovini. Budite dio naše inicijative i svojim angažmanom doprinesite boljem suživotu u svojoj sredini. Prijave šalžite na e-mail: prijava.gisk@gmail.com. U aprilu i maju su nastavljene redovne aktivnosti obilaska lokalnih mjesta sjećanja i susreti sa lokalnim akterima, prije svega političkim liderima u zajednici.



GISK



Centar za mlade INPUT
Ul. Mokušnice 10,
72000 Zenica
Tel./fax: +387 62 116 343
www.inputcentar.com
info@inputcentar.com
E-mail: info@inputcentar.com



Životna 17 godina – 28.000+ priča. Jedna od njih je Adinova.

Još 2018. godine, jedan tihi gimnazijalac drugog razreda zakoračio je u Centar za mlade INPUT – vođen preporukom, ali i željom da pronađe nešto više. Tu je sreo mentora, podršku i prijatelje. Sreo je znanje koje mijenja živote. Sreo je sebe.

Pod mentorstvom Adija Salčinovića, Adin je započeo svoje putovanje u svijet tehnologije i zajedništva. Ubrzo je, iz uloge polaznika, prešao u ulogu mentora – i sam počeo prenositi znanje drugima. Od tada, nikada nije otišao.

Danas, 2025. godine, Adin je magistar softverskog inženjerstva. I dok njegova diploma sja, još jače sja naš ponos. Jer Adin nije samo uspješan mladi čovjek. On je dokaz da kad vjerujemo u mlade, kad ih osnažimo, oni nas sve povedu naprijed.

Jer INPUT nije prostor – to je pokret. To je srce koje kuca u ritmu mladosti. Uz mlade i za mlade – inspirisani mladima.



Interaktivne STEM radionice u American Corner Zenica!



Centar za mlade INPUT održao je interaktivnu STEM radionicu u American Corner Zenica! Zajedno smo sastavljali i programirali robote koristeći Arduino, učili kako funkcionišu senzori, motori i mikrokontroleri, te na zabavan način zakoračili u svijet tehnologije!

Posebnu čar dali su učenici i njihova nastavnica Aldina, koji su sa velikim interesovanjem učestvovali u svakom koraku – bravo za njihovu hrabrost i znatiželju!

Zahvaljujemo se Američkom kutku na gostoprimstvu i svim učesnicima na pozitivnoj energiji! Vidimo se uskoro sa novim STEM izazovima!



Digitalni most u Brezi - Uspješno realizovana radionica!


U sklopu projekta "Digitalni most: Osnaživanje mladih i žena za budućnost", Centar za mlade INPUT održao je edukativnu radionicu u prostorijama Društveni centar Breza.

Radionica je bila posvećena jačanju digitalnih kompetencija, a poseban fokus stavljen je na upoznavanje i korištenje alata ChatGPT i Canva. Polaznice su sa velikim interesovanjem pratile svaki dio programa, aktivno učestvujući u praktičnim zadacima i vježbama. Kroz interaktivni rad i mentorsku podršku, učesnice su imale priliku razvijati vlastite digitalne projekte, osnažiti se za online radno okruženje i unaprijediti svakodnevnu upotrebu digitalnih alata.

Projekat je podržan od strane Charity Foundation La Terra Nostra.



Vikend ispunjen znanjem, podrškom i mladalačkom energijom u Centru za mlade INPUT!



U predivnoj atmosferi druženja i učenja, naš Centar je proteklog vikenda bio domaćin edukativnim radionicama koje su realizovali stipendisti Fondacije Hastor. Radionice su bile posvećene temama mentalnog zdravlja, kontrole stresa i suočavanja s anksioznošću.

Mladi su kroz interaktivne sadržaje i kreativne postere učili: kako prepoznati i savladati stres, kako se nositi s negativnim mislima, koliko su važne tehnike disanja, opuštanja i fizičke aktivnosti, kako pružiti podršku sebi i drugima.

Radionice su bile prilika za lični rast, jačanje međusobne povezanosti i razvoj zdravih navika za

očuvanje mentalnog blagostanja. Kroz svaki osmijeh, poruku podrške i podijeljeno iskustvo, stvarali smo prostor sigurnosti, povjerenja i zajedništva.



Uspješno održane radionice u okviru projekta eSAFE u Prvoj gimnaziji Zenica

U prostorijama Prve gimnazije Zenica održane su dvije edukativne radionice u okviru projekta "eSAFE - Sigurno i odgovorno korištenje interneta", na kojima je učestvovalo oko 50 učenika.

Radionice je vodio prof.dr. Hadžib Salkić, koji je kroz zanimljivo predavanje upoznao učenike sa važnim temama sigurnosti i odgovornog ponašanja na internetu. Nakon toga, učenici su učestvovali u Kahoot

kvizu za provjeru znanja, a zatim su kroz grupni rad imali priliku da unaprijede razumijevanje i podijele svoja razmišljanja.

Projekat se realizuje uz podršku Evropska unija u Bosni i Hercegovini, Udruženje "Naša djeca" Sarajevo, World Vision Bosna i Hercegovina i Ministarstvo za ljudska prava i izbjeglice BiH.

Hvala profesoru Hadžibu i učesnicima na angažmanu i motivaciji, kao i upravi JU Prva gimnazija u Zenici na gostoprimstvu i tehničkoj podršci!



Mladi za mlade – digitalno, snažno i povezano!

Predstavnik Centar za mlade INPUT učestvuje na treningu u okviru platforme DIGI:MON, koju implementiraju World Vision Bosna i Hercegovina i Udruženje "Naša djeca" Sarajevo, uz podršku Evropske unije i Ministarstva za ljudska prava i izbjeglice BiH – platforme koja mladima širom BiH daje prostor da uče, djeluju i ostave trag!

DIGI:MON okuplja energične, kreativne i predane mlade, stvarajući mrežu zajedništva, znanja i pozitivnih promjena.

U fokusu ovog susreta su: razmjena iskustava i rezultata malih grantova, rješavanje konkretnih problema kroz lokalne projekte, osmišljavanje zagovaračkih kampanja koje donose stvarne promjene, dogovor o narednim koracima i jačanju digitalne mreže mladih.

Digitalni centar za mlade postaje mjesto gdje ideje mladih postaju pokretači društvenih promjena. Zajedno gradimo generaciju koja zna, može i hoće više!



INFORMACIJE / NAJAVE / DONATORI / POZIVI

1. Otvoren je poziv za podnošenje prijava za nagradu EU za istraživačko novinarstvo. (PODSJEĆANJE)

Nagrada je namijenjena za istraživačke priče o temama ključnim za javnost, uključujući korupciju, kršenje ljudskih prava i druga pitanja.

Nagradni fond za nacionalnu nagradu je 10.000 eura. Novinari se mogu prijaviti i za regionalnu nagradu (sa fondom od također 10.000 eura) za istraživanja koja utiču na cijeli region Zapadnog Balkana i Tursku.

Rok za prijavu je 16. juni 2025. godine.

Više informacija dostupno je na: <https://tinyurl.com/mr3ccmx8>

2. POSTANI GRAĐANIN-AKTIVISTA!

Ako želiš napraviti promjenu, na pravom si mjestu!
Prikluči se ekipi koja pravi razliku i postani građanski aktivista/kinja!

Uključi se putem

obrasca na <https://ukljucise.podlupom.org/>

Prijavite se [ovdje](#)



3. Otvorene aplikacije za 20. EMMAUS Međunarodni omladinski radni kamp



Prijave su otvorene!

20. Međunarodni omladinski radni kamp

Srebrenica – Potočari

13. – 23. juli 2025.

Pozivamo sve mlade iz Bosne i Hercegovine, uzrasta od 16 do 30 godina, da se prijave na jubilarni 20. Međunarodni omladinski radni kamp!

Ovo je prilika da kroz zajednički rad, edukaciju i dijalog doprinesemo kulturi sjećanja, solidarnosti i međusobnog razumijevanja.

Prijave su otvorene – ne propusti priliku da postaneš dio ovog značajnog događaja!

Više informacija i prijavni
formular: <https://forms.gle/rmB25JkB5jrfatwo9>



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

**Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orctuzla@bih.net.ba**

Mjesečni bilten uređuje Omladinski resursni centar - ORC Tuzla

Urednica Biltena:

Nadina Mehić

Prevod Biltena na

engleski: **Asja Šerifović**

WEB stranica Mreže:

www.orctuzla.ba

Mejling lista Mreže:

omladina@orctuzla.ba

Webmaster:

anicic.dev@gmail.com

ISSN (BHS Varijanta): **2831 – 0845**

ISSN (Engleski): **2831 0853**